

INUIT ATAQATIGIIT

Inatsisartuni



UPA 2017/166
Nuuk, 20.04.2017
Kelly Berthelsen

Utoqqarnut immikkut siunnersuisarfimik pilersitsinissamik pisariaqartitsineq periarfissarlu pillugit kingusinnerpaamik 2017-imi kommuninik oqaloqatiginninnissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Kommuninik oqaloqatigiinnerit inernerit iliuuserisassatullu eqqarsaatigisat utoqqaallu siunnersorneqarnerisa patajaallisarneqarnissaanut aningaasaliinissamut periarfissat kingusinnerpaamik UPA 2018-mi allakkatigut Inatsisartunut nalunaarusiarineqassapput.

(Inatsisartunut ilaasortaq Debora Kleist, Inuit Ataqatigiit)

Aalajangiiffigisassatut siunnersuut pillugu imaattumik Inuit Ataqatigiinniit oqaasissaqarpugut.

Utoqqartavut inuiaqatigiinni napatitsereerlutik utoqqalinerminni nammineersinnaassuserminnik annaasaqarusuttanngaat.

Kisianni suliunnaarluni, immaqalu ilaatigut kisimiittunngorluni, utoqqalinersiaqalerluni, atortorissaarutinik nutaaliaasunik atuinissamik piunnaaffigineqalerluni nalorninartut amerlasartussaapput.

Aamma inuunermi allannguutit annertuut aqqusaarnerini qallikkuinnaanngitsoq kisiannili aamma tarnikkut ilungersunartorsiulerfimmi sumut saaffissat pillugit siunnersorneqarnissat pisariaqartassaaq.

Tamakku eqqarsaatigalugit siunnersuuteqartoq Inuit Ataqatigiinniit tapersorsorluinnarparput.

Aamma neriuutigaarput utoqqarnut siunnersuisarneq siammasinnerusumik paasineqassasoq, tassa utoqqalillutik suliunnaarsimasunuinnaanngitsoq aamma siunnersuisoqartassasoq.

Tassami ilinniagaqalernissamut, angajoqqaanngornissamut, suliffeqalernermit ikaarsaariarneq assigalugu utoqqanngorluni suliunnaarneq, kisimiittunngorneq, utoqqaat illuannut nuunneq, minnerunngitsumillu timikkut pisinnaasanik annaasaqarneq assorsuaq inuunermik allanngortitsiviusarput taamalu piareersarfiusariaqarlutik.

Aamma nammineq atukkanuinnaq tunngasuunngitsunik utoqqaat nalaataqartarput. Assersuutigalugu ilaanni utoqqaat qitortanminnik ernuttaminnilluunniit imaluunniit ilisarimasaminnik inersimasunik, ilaatigut immaqa meerartalinnik inisimasoqartariaqartarput, taamaalillutillu namminiinnarmut tunngasuunik akisussaaffeqalersarlutik tamakkulu pillugit siunnersorneqarnissaminnik pisariaqartitsisarlutik.

Taamaammat utoqqarnut siunnersuisarnermi utoqqalinissamut piareersarnissap pingaassusia suullu piareersaatigisariaqarnerat pillugu siunnersuisoqartarnissaa ilanngullugu eqqumaffigeqqunassaqaq.

Taama oqaaseqarluta aalajangiiffigisassatut siunnersuutip akuerineqarnissaa inassutigissavarput.